

24 OCT 2000

Saudi-tiba

PUTERA ABDUL AZIZ TIBA UNTUK LAWATAN LAPAN HARI

SEPANG, 24 Okt (Bernama) -- Timbalan Perdana Menteri Kedua Arab Saudi Putera Sultan Abdul Aziz Al-Saud tiba hari ini untuk lawatan lapan hari ke Malaysia.

Ketibaannya di Lapangan Terbang Antarabangsa KL pada 3 petang dengan pesawat khas kerajaan Arab Saudi, disambut oleh Perdana Menteri Datuk Seri Dr Mahathir Mohamad, Timbalan Perdana Menteri Datuk seri Abdullah Ahmad Badawi dan Timbalan Menteri di Jabatan Perdana Menteri Datuk Tengku Azlan Sultan Abu Bakar selaku menteri pengiring.

Sejurus tiba, Putera Sultan Abdul Aziz memeriksa perbarisan kawalan kehormatan oleh 103 pegawai dan anggota Rejimen Pertama Askar Melayu Diraja dari Kem Sungai Besi.

Lawatan beliau adalah atas undangan Dr Mahathir. Lawatan itu akan memberi tumpuan kepada beberapa isu semasa terutamanya ke arah membawa keamanan di Asia Barat dan konflik Palestin dengan Israel.

Putera Sultan Abdul Aziz, yang juga Menteri Penerbangan dan Pertahanan Arab Saudi, disertai delegasi 164 yang terdiri daripada empat putera Saudi, tiga menteri kanan dan pegawai-pegawai kanan negara itu. Mereka akan diraikan dalam jamuan makan malam di Putrajaya oleh Dr Mahathir malam ini.

Esok Putera Sultan Abdul Aziz akan menerima ijazah kehormat Doktor Falsafah Sains Politik dari Universiti Islam Antarabangsa (UIA) sebelum menemui Dr Mahathir pada 3 petang di Putrajaya, diikuti pertemuan dengan Abdullah.

Semasa lawatannya itu, Putera Sultan Abdul Aziz juga dijadual menghadap Yang di-Pertuan Agong Sultan Salahuddin Abdul Aziz Shah pada Khamis ini selain mengadakan pertemuan dengan beberapa menteri kabinet lain.

-- BERNAMA

APG AHH MAI